

կայական գնալ յէջմիածին, եւ ձեռնադրեալ Եպիսկոպոս զարձցի անդրէն 'ի Կոստանդինուպօլիս: Իսկ զԱնդրէաս վարդապետն, որ եբեր զՊատրիարքական հրովարտակն, պահել առ իւր զաւուրս 20, և յետ կատարելոյ զուխտս, զարձուցանել զնա անդրէն 'ի Կոստանդինուպօլիս: Այս նամակ Ամիրայից և Արքունի հրովարտակն եհաս յերուսաղէմ 'ի ձեռն Անդրէաս վարդապետի (1819 - 'ի 6 Օգոստոսի), և նստաւ Գաբրիէլ Եպիսկոպոս յԱթոռ Պատրիարքութեան Երուսաղէմի, և գրեաց զիւր շնորհակալութեան և հնազանդութեան առ ազգն, և թախանձանօք խնդրէր առաքել զհրովարտակն դրան Բեթղեհէմի (յ3 Սեպտեմբերի) մեծ յուսով ակնկալեալ սպասէին միաբանք դալստեան հրովարտակին վասն փակեալ դրան նախ քան զգալուստ Կուսակալին, այլ 'ի զուր և ընդունայն եղեն այնչափ ջանք և աշխատութիւնք նոցին, որ մեծամեծ ծախիւք կրկին անգամ առին Իլամ և հանրագիր յայլազգեաց, եւ առաքեցին 'ի Կոստանդինուպօլիս, զի թերեւս հնարս գտցեն, այլ չեղեւ ինչ:

Իբրեւ եհաս Կուսակալն յերուսաղէմ (յ3 Ապրիլի): Եւ ոչ եգիտ զհրովարտակն, ասէ՝ նախորդն իմ ընդդէմ իրաւանց եւ սակս ազահութեան իւրոյ փակեալ է զայն դուռն՝ և սպառնայր բանալ 'ի նախատինս Հայոց. զի Լատինք խոստացեալ էին տալ նմա 75,000 դահեկան, այլ նա ոչ առ յանձն, և ետ գիր Հայոց զի փակեալ մնասցէ դուռն, և Դատաւորն Իլամ առ Տէրութիւնն, զոր և առաքեցին 'ի Կոստանդինուպօլիս ընդ Յակոբ վարդապետին:

Ի հասանիլ Կուսակալին՝ Յոյնք մեծամեծ ընծայիւք դիմեցին յոտս նորա, և հաճեալ զկամս նորին առին հրաման 'ի գիշերի. զի յամենայն տեղիս նոցա լիցի առաջնութիւնն, այսինքն 'ի Ս. Յարութիւն, յԱստուածածին և 'ի Բեթղեհէմ, նախ Յունաց կատարել զպաշտամունս իւրեանց եւ ապա Հայոց. լուեալ զայս վարդապետաց, մատուցին առ նա դիր բողբոյ, և յանդիման եղեն երկօքին ազգք առաջն նորա 'ի դատաստան. Յոյնք մատուցին զհրովարտակն ՎԿԼ, նոյնպէս և Հայք զերկուս հրովարտակս 'ի նոյն թուականի, եւ ասեն՝ եթէ ըստ հրամանի Արքային լիցի